

張氏室遺集

張雨田題



纂經圖譜集

泉江高時顯謹題

歲在辛巳星輝昂顯
王氏學禮齋集

敘

嗚呼自國變後余同年友吳縣曹侍讀君直館城西韓氏重與握手悲感五內言不能盡因爲跋其禮議彙深致國家禾黍之感而侍讀不以余言爲臯又二十餘年侍讀已前卒其從弟編修叔彥命其弟子王君欣夫裒集其遺書歷十數年之久補其殘分其類定爲箋經室遺集二十卷徵敘於余余以不能閱見侍讀所學不欲作尋常敷衍語以辱侍讀復王君王君顧再函督之會余以疲癯傾仆負茲累旬未報命最後君復以手民刊印旣竣縣工待文並寄其師編修所撰從兄家傳來眎余余體不仁甚矣讀其文毛骨竦而精神頓振喟然嘆曰國家之禍變未有甚於今日者也民生之憔悴未有甚於此時者也而其源皆由於禮之亡故記有之曰壞國喪家亡人必先去其禮禮之興亡國之存亡繫焉王君最後之以家傳來也蓋不但欲存侍讀之學并欲存侍讀之志余雖病烏能無言猶憶宣統己酉庚戌閒與侍讀同在禮館會 今上以孝治天下特詔滿漢通行三年喪 旨下朝臣僉請丁憂之後開缺留差於是令館中議當差服時館中員十二人侍讀首主駁議以丁憂人員不當留差無服制可議余與張君聞遠從而和之余又檢查 大清會典得 高宗純皇帝諭旨數通蓋當時疆臣有以得力人員如城工廠銅諸要工丁憂後仍請留差之奏

進者 純廟嚴旨飭責余迺謹敬鈔錄呈總理並以上尙書協辦榮公慶議卒格不得上嗣是而律學館修改律令所改刑制其意蓋欲舉三綱而悉去之惟於第一綱則猶有所顧忌而不敢發其第二三則已昌言之無忌憚又詆禮館所持爲迂闊而不可用侍讀力駁箸議若干條顧爾時浮言鼎沸一簣之士焉障江河總理閩縣陳文忠公弢庵先生在館時時與侍讀輩咨嗟太息而散余與聞遠先後出都不逾年而亂作嗚呼履霜堅冰醞釀久矣豈一朝一夕之故可勝嘆哉自辛亥後余與侍讀僅得在韓館一見與聞遠窮居海濱余家城中聞遠居崑山丙舍亦不常晤聞遠嘗謂余吾輩今日如嬰兒失母余亦言吾輩今日真西銘所謂無所逃而待烹者侍讀以癸亥元旦捐館舍聞遠亦以甲子秋下世學術無人匡輔煢煢在疚追憶壯歲從聞遠問學蒙其指示遂物涉賈孔諸儒之學入都後又親炙侍讀在館得追隨年餘埤益甚衆余平日治經本分半及洛閩又好南閣祭酒文字之書侍讀與聞遠深知余中學不專心之病終竟未能自克今年七十有五犬馬齒衰死亡無日執友淪喪追悔無從惟侍讀從弟編修巋然尙存執義彌堅所學彌邃顧相隔數百里僅以寤寐神明相通不獲走金閭與編修一握手相與追西臺往事并一弔侍讀之靈是則可爲痛心者矣侍讀之學余不足闕僅紀其在禮館時犖犖大節以箸其志其平日

撰著已詳於編修所撰傳中不具論顧編修病目不能親披閱非得王君苦心搜集
博意讎校不得底於是集之成是亦足以慰侍讀於九原而塞編修鵲鴿之悲已嗚
呼禮也者千載之事然則侍讀之書亦千載之書而其志亦千載之志余悲極而慰
而喜竊謂將來必有能讀其書論其世知其人而上其著述於輜軒之使俾藏柱下
者龍集辛巳秋八月癸巳年愚弟華亭錢同壽頓首謹敘

敘

同歲生曹君君直既歿之十九年吾黨之賢者始鳩貲刊其所爲文若詩曰箋經室遺集先時君所著司馬法古注輯本盛宏之荊州記輯本蒙韃備錄校注禮議樂府補亡凌波詞已刊布海內茲集則王君欣夫所裒集成之者也既殺青王君以余與君交深且久屬爲敘釋名敘杼也杼洩其實宣見之也茲集之實曰經術曰考訂曰校勘曰輯佚曰厯算曰醫方曰音律曰詞章凡此八者已宣見於王君跋中余無能更贊一詞無已則舍其文之實而敘其行與夫家國變遷之由師友死生之際而余與君三十年之情誼亦略見焉天之道曰陰與陽國家之政曰刑與禮刑失禮失鮮不亡也光宣閒懲於外侮懸立憲之詔以徇天下耳目命改新刑律又設禮學館修大清通禮此如董子所云一手畫方一手畫圓莫能成者也君既爲禮學館纂修官又邃於禮經目睹世教凌夷邪說方盛文武之道將墜於地以爲亂之所生惟禮可以已之冀得假手起行其學凡所條議皆繫乎綱常名教之大又駁新刑律之害於倫理者凡數事今集中所存以在館時撰進文字爲獨多然其精者在禮議中書既成未及上而政變而君亦僅僅以空言垂後世悲夫君三禮之學受之於定海黃元同元和管申季兩先生校讎目錄受之於江陰繆藝風先生既與余同舉於鄉得見

余外祖祥符周季貺先生而所學益大醫學詞章之學則受之於尊人實甫年丈年
丈既歿事年伯母馬太恭人若孺子慕不幸先馬太恭人以歿既歿而馬太恭人哭
之哀君忽張目曰母勿哭兒歸泰山將爲泰山神也棄官後嘗館松江韓氏貴池劉
氏其與余蹤跡最密則在吳門與官京師時其在吳門恆宿余所居陸懷廬談藝達
旦及在京師他不記記君初假館宗伯玉岑師家余訪君值大雪因留宿十景花園
中與宗伯師諸子煮酒高會夜分起視簷外垂柳絲絲盡白朔風吹拂人面殘醉爲
之醒今幾日耳微獨園居易姓宗伯師且與其次子世卿員外以家國之故除夕同
仰藥殉焉此尤滄桑後之慘變讀君遺集而腹痛及之者也辛巳八月年愚弟如皋
冒廣生敘於海上寓廬

誥授通議大夫內閣侍讀學士君直從兄家傳

嗚呼曾子有言百年之中有疾病焉有老幼焉而詩小雅頌弁之篇稱豈伊異人兄弟匪他死喪無日無幾相見其言婉篤深至讀之絕痛人生天地閒如六驥足之過一隙人倫之中惟兄弟相處最久然出處離合往往中年異轍歡笑情話能幾何時沉風雲變幻山淵反覆之秋急難孔懷相憐尤切而歲寒松柏交柯連枝同甘風饕雪虐之困百折而不回其惓惓惻惻相依若性命痛癢一體珍愛護惜爲何如一有徂謝其悲積於中永久而不忘更何如耶余自宣統辛亥後隨伯仲兩兄及吾從兄君直閣讀學矢志偕隱閉門絕世相與忍淚看天蒿目憂世極天下之至悲而論學論治陳古慨今以維持萬世名教綱常相勗又極天下之至壯抵掌扼腕慷慨沈鬱當日情事歷歷心目如何不淑仲兄最先棄吾越兩年而兄卽繼之又數年而伯兄繼之天下滔滔四顧茫茫獨行踽踽吾其何以爲心耶兄之歿且二十年當世博學敦道君子始刊其遺文行於世余於是掇舉兄行事大略以告天下後世讀兄書者兄諱元忠字夔一號君直晚號凌波居士姓曹氏系出宋 武惠王 八世祖侍樓公以明諸生自安徽歙縣來遷始爲江蘇吳縣人棄青衿隱於沽酒累世不仕讀書積善乾隆嘉慶閒始有以科第文章政績顯者 曾祖考敬堂公諱炯醫學至精

行爲人師 祖考雲洲公諱維坤至仁惻隱以醫活人無算 曾祖妣張太夫人

祖妣陶太夫人仁孝徽音婉愉內則世濟厥美 雲洲公四子 先君子居長次

叔父諱毓駿年十一卽徧讀十三經及醫書不幸殤次 叔父實甫公諱毓秀號春

洲次 叔父紫荃公諱毓英後改鍾英兄實甫公長子也公初娶 陶太夫人生一

女殤繼娶 馬太夫人兄及諸弟妹皆馬太夫人出兄至性過人六歲在塾聞雲洲

公棄養奔歸痛哭不止事實甫公馬太夫人先意承志曲得歡心數十年如一日讀

書穎悟年十三從名儒管申季先生禮耕學先生爲南園陳先生再傳弟子兄依據

師授研核訓詁考詳典章誦讀校勘輒至深夜光緒甲申以第一人補博士弟子督

學瑞安黃漱蘭師器異之咨送南菁書院肄業從定海黃元同師以周受詩禮羣經

篤志深造覃思研精每考一義必博稽羣書通貫流源沈潛反覆古經師訓義不以

己意穿求崖穴往往積古霾晦之義豁然復明蓋所謂好學深思心知其意者余少

兄二歲自少相與論文至歡兄旣爲管先生入室弟子余亦時時從先生問故又同

受知於瑞安受經於定海然余從定海師質正諸大義不久卽歸而兄止宿南菁有

年每假旋相就論學各舉心得相證往往不謀而合爾雅辯言斷斷如也相說以解

怡怡如也蓋自是終身以爲常於時兄學業日進聞望日隆歷任江蘇學政如長沙

王益吾前輩茂名楊蓉浦師宗室溥玉岑年丈皆重兄學以其文刊入江蘇試牘南菁書院課藝元同先生爲禮經大師嘗以所著軍禮司馬法考徵與兄所輯司馬法古注合編並行各存一說其重之如此甲午以優行貢成均遂舉於鄉應禮部試在位通人爭相汲引而數奇不偶屢試僅挑取謄錄吳橋劉博泉侍郎南皮張文襄師先後保奏經濟特科試又不第文襄深惜之蓋兄文章爾雅多據古義志乎古必遺乎今且得之不得時數適然如朱笥河索汪容甫卷不可得孫伯淵以用古字散館見紉射策中否何足爲大雅毫末輕重耶兄志在行道顯親及時濟國由順直賑捐案內報捐內閣中書適毓紹岑同年督皖學固請襄校試卷得士稱盛乙巳入京供職充 玉牒館漢校對官並派檢閱大庫書籍考訂宋元舊槧尋大庫書歸學部寶瑞臣侍郎聘爲學部圖書館纂修竟其事其閒直隸總督某某禮聘掌教北洋師範學堂兼中州學堂一日見其出行以黃土填道知其有不臣之心立去之丙午充國史館校對官本衙門撰文兼會議政務處行走丁未直省舉貢考職奉 特旨充襄校同考官是年 玉牒告成奏保以內閣侍讀遇缺卽補戊申 朝廷立禮學館修 大清通禮溥玉岑尙書奏派兄爲纂修規畫條例延聘師儒悉諮訪焉兄由是薦林晉霞大令頤山張聞遠同年錫恭錢復初孝廉同壽及余余以蘇鄂存古學堂

事未能入京林張錢三君並入館爲纂修時禮教陵夷邪說蠡起裂冠毀冕拔本塞源有岌岌不可終日之勢兄以亂之所生惟禮可以已之館中諸友有持異議欲亂舊章者兄與張錢兩君正言力辯援據古今申明大義以合乎天則民彝之正著禮議數十篇聞遠亦著芻議若干篇總理陳文忠公寶琛于文和公式枚皆深韙之歷三年通禮成未及奏上而亂作天下惜之旣而劉翰怡京卿以禮議付刊行於世余爲跋文發其大義嗚呼光宣之間陰陽爭死生分之秋也舉世競言新法而朝旨特命修禮又得禮學名儒如數君子者俾斟酌論定勒成不刊之典此大過棟橈之良木未濟月晦之庭燎也時余蒙 德宗景皇帝特旨以所著禮經校釋發交禮學館旣留滯家巷仍聘爲顧問兄與聞遠深以余索處不能協力正言斷辭摧陷羣邪爲憾然余知兄及張錢兩君卓識毅力足以稱 聖意奠邦基憲章稽古通變宜民可措正而施行爲中興茂矩何意中原雲擾典冊塵封此豈惟我 朝之不幸迺天經地義五帝三王以來禮教之大厄然兄及聞遠書已行復初老健著書甚多修禮大略文獻猶足徵豈非他日三雍講學虎觀通義之資乎宣統紀元充 實錄館詳校官委署侍讀庚戌又奉 命充舉貢考職同考官尋蒙 欽選爲資政院議員會議時凡三綱六紀大防所在必力申正誼拒遏詖邪冀正人心而固邦本法部草刑

律草案成摘其害於倫理者作駁議數篇關係世道尤重今附刊禮議後辛亥聞起用某大臣大駭謂獨坐空山引虎自衛必非國家之福及某大臣到院請其將時局大勢明白公布迨變急糾集同志草疏嚴劾其誤國大罪未及上而俯允致政之詔已下痛哭不已尋京師兵變朝官紛紛出走兄誓效死弗去壬子正月驚聞實甫公棄養痛幾絕冒險奔喪抵家號哭伏地昏暈久迺蘇自是矢志侍母朝夕不離自離聖室後不復入私室宿太夫人室中十年聞太夫人有聲息必急起視飲食寒暖體會入微是用壽考康強年至九旬神明不衰家貧節衣縮食以奉甘旨支門戶獨抱遺經不接人事惟與伯仲兩兄及余並朱古微侍郎鄒詠春葉菊裳兩侍講張聞遠孝廉諸執友揚摧古訓慨論時事作爲詩歌以發無窮之悲天鳳地皇之間使歌豐輩來說欲以爲內史峻拒之歎曰餓死事小失節事大梅村往事豈不傷心況今何時耶丙辰馬太夫人八十壽辰蒙特恩賞福壽字及修齡錫福匾額後太傅世文端公以禮議進呈御覽特賞內閣侍讀學士並賜聯云讀書衆壑歸滄海下筆微雲起泰山兄感激天恩愧無仰報自辛壬以來無日不渴望中興丁巳五月之變日夜焦急憂心如焚時聞遠適至余與同在兄所聞孽火燎原相對兩泣歸見兩兄並嗚咽椎胸幸上天眷佑七鬯無驚心始稍安兄居恆悲憤深以不獲侍實

甫公疾爲生平大痛而上瞻霄漢下顧蒼生長夜漫漫顛拂滋甚積瘕在心肝脾交病年甚一年自知病根在心非藥可療以數十年治經心得於世道人心實有裨益未經寫定考論文史辨正金石文字多發前人所未發恐年歲不與力疾修補一日余聞兄病往視愴然謂余曰昨日困甚欲將殘橐送弟爲我善後余聞心惕甚強言勸慰請其節勞雖然著述之勤他人以爲苦而吾輩則樂在其中以兄將父之痛憂國之思固結不忘是用少壯精力強盛而卒不能至伏生申公之年病之所由來固在彼而不在此也庚申後病益劇然恐馬太夫人憂未嘗一日不強起非慘怛萬無可忍必強爲歡笑以慰母心壬戌臘且盡疾革得御賜福字壽字及九天垂露畫軸感激喜躍病若霍然蓋忠愛之誠始終如一惟心藥能治心病然精華竭矣越日又變馬太夫人視之猶強言慰藉顧視兩妹諄諄以身後曲慰老親爲屬癸亥元旦時加寅卒年五十有九遺令喪禮一遵皇朝制度又以事馬太夫人未及終養命置斬衰服於棺中時從弟驛軒在京以兄忠盡志節上聞仰荷恩綸特加褒恤榮哀盛典名教增光矣兄幼而好學至老不衰自弱冠後卽草六藝論疏證晚年又欲爲論語舊疏考證謂邢疏說禮多同孔沖遠禮記正義而沖遠又本之皇疏皇氏疏禮又疏論語其說必同今世所行論語皇疏未可盡信叔明書中說禮詳備與記疏

相應者蓋眞皇氏舊文其論甚塙其餘所欲論著者多惜皆未成又考論書泰誓甚詳及論服注左傳用三統麻以殷麻參校皆有特識語在文集中其治經家法與余及聞遠皆塙宗先師高密鄭君精心探索弗明弗措旁推午貫義據通深識者以爲錢竹汀孫薇隱之嗣響性好表章古書前賢撰述多爲序論聞遠同年喪服鄭氏學有功聖經至大兄語翰怡京卿刊之親爲校勘實與禮議並爲垂世立教不刊之書綜其生平經術篤守許鄭文章出入漢魏制行一以東漢氣節宋賢理學爲宗遇有離經叛道非聖無法敗名失節巧飾淫辭者必力陳正義斥之所著自禮議外有司馬法古注音義盛宏之荊州記輯本樂府補亡蒙韃備錄校注諸書皆已刊行顧黃王三儒從祀錄已定稟未刊又有錫福堂詩詞彙箋經室文集宋元本古書考證學志等書未及寫定編簡叢殘塗改或難識別余以目疾不能自校以屬弟子王大隆欣夫精心詳勘拾遺訂誤出入十年網羅放失總編爲箋經室遺集二十卷雖兄生平蘊蓄未盡發抒而其博學深識貞志純行亦於此可見矣兄幼承實甫公指授善爲詞朱古微前輩已爲刊行我家世傳醫學兄又多得古醫書深通其義厲疾沉疴治每立效歸隱後同人爲訂醫例助菽水資然貧者輒不受酬仁心愷惻往往忘己之疾以治人疾聞遠嘗疾篤以俗醫皆去髮媚世之徒不願服其藥兄馳往松江治

之轉危爲安多羅特文忠公升允寓青島病甚諸遺老函請兄往診兄以公孤忠體國而島鮮良藥因裹藥往治公疾瘳贈以詩曰正色立朝日靡言亂政時希文不爲相餘技作良醫蓋約而當矣兄生時雷雨交作沒前亦如之自知將逝又嘗夢遊泰山或指一廟神象曰卽君前身意生有自來耶昆弟五人兄爲長次元達字花農吳庠生有孝行實甫公疾刲臂和藥得效次元文字叔明次元琦字仰韓並聰穎早成惜皆不永年季元森字驍軒有幹事才兄篤友諸弟勤勤教誨荆枝屢枯心怛形瘁忍哀致歡曲慰親心驍軒不得已爲祿仕然心實在 皇室兄深念之時貽書慰勉妹三長殤次元燕字紉秋適張喜從兄論學工詩詞善書季元嫫字曼紅適朱亦善文翰馬太夫人年高俱歸侍養兄疾連年亦賴佐理飲食藥餌配徐淑人柔順儉約相夫育子黽勉忘劬長子岳覲譯學館畢業舉人七品小京官外務部主事亂後亦迫於處境不克家食兄戒以安分守己多長閱歷勿事他求每見新進紈袴奔走豪門求官謀差不知自愛身敗名裂者比比汝慎勿效兄沒後遂不復出每與余言明於君臣大義非甘心失身者比保守遺書弗敢失墜惜早卒次岳瑞爲叔明後女二一適鄒一適楊孫鳳年孫女二比歲同人謀刊兄書鳳年徧搜劫餘遺橐致欣夫資

補輯云

系曰余與兄幼俱及見 祖考雲洲公嬉戲重親前爲歡繼以屋狹分處彼此時時

從尊長相就十餘歲時論文論學娓娓不倦駸駸乎講求經術迨弱冠後兄每自南

菁歸與余及故執友王虞笙廣文大綸考辨經史縱論古今得失之林天下治亂興

衰之故其味醞醞其芬郁郁其聲洋洋古人所謂漸離擊筑旁若無人高鳳讀書不

知暴雨者真未足喻其樂也不幸世變日急光緒庚子之禍相約甯爲猿鶴毋爲臣

僕恨禮學館之徵余留滯盤桓重負兄意及大陸既沉兄弟四人偕隱聞遠亦每歲

自松江來慷慨劇談思所以旋乾轉坤維三綱於不墜拯四海之倒懸其相契之深

相期之重纏綿固結而不能相離者又豈語言之所能罄哉伯仲兩兄年長矣余與

兄及聞遠齒不相懸每相謂孰爲後死搜輯遺書敘述行事當兼其任而孰意均集

於余耶兄之沒也聞遠聞耗卽素車白馬而來伯兄與余朝夕往省叔母幸高堂無

恙可慰兄心迨明年甲子聞遠避亂卒於旅所然與兄皆未及見 聖駕蒙塵及

東陵被盜之變余撫膺懷舊每歎生不如死然逝者有靈欲叩帝閭而訴真宰其怨

恫何以異於生耶天道循環否極則泰守先王之道待天下之清幽明同此心而已

矣龍集辛巳五月從弟元弼謹撰